

UANËN DADA UAIÐËMPI I

Nuquin Papabëd ënëdenquoio yec tabadte chianiaidquoio

1 ¹Abia Yampidënuquoio matsesun Esuquidistun chuibansho ëbëd icquidobëdtan tantiapadenembi. Aidi ëbëd icquidobëdtan ispadenembi. Aidi ëbëd icquidobëdtan mishpadenembi. Aidi Nuquin Papabëd ënëdenquoio yec tabadte chianiaidquoio nec. Aidquoio chuiquin dada uaid nëid nendac. Aidquoio tantiaquido icquin bëdamboen ista. ²Aid, abuc Nuquin Papabëd ënëdenquoio yec tabadboedi nidaidënuësh matses icnuec chopanëdash. Choshon abipadquoio yec Nuquin Papabëd ënëdenquoio yec tabadte ismequin chianiaidquoio ëbëd icquidobëdtan isteneshun chuibanec nebi. ³Aidi ëbëd icquidobëdtan ispadened adembidi ëbëd icquidobëdtan tantiapadenec chuibanec nebi ma mibitedishun tantiash shubu abentsëquën tabadacimboec ma tabadpanu quesun. Nuquin Papa tantiaquid icquin aton Madombo Esuquidistu tantiec Nuquin Icbobëd shubu abentsëquën tabadacpadec nuqui bëdamboec tabadendac. ⁴Esuquidistu tantiaquidtedi shubu abentsëquën tabadacimboecquido nec, quequin chuiquin dada uaimbi ma aid tantiash, Cuishon. Bëdambo iquebi, quiacpadec ma mibitedi tabadpanueshun.

Nuquin Papa Bëdamboecquid Abentsëcquiobi nec quiaid

⁵Esuquidistun Nuquin Papa chuibansho nuqui tantiondacpadomboen chuioaimbique. Tantiata. Nuquin Papa Bëdamboecquid Abentsëcquiobi nec. Icsapenquiocquid aidi nec. ⁶Adquid icnuc, Nuquin Papan shubun icquid nebi, queboedi ambi chiaid niacquin abipenquoio chuiquid nuqui nendac. ⁷Nuquin Papan chiacpadomboen nabanquidquoio iquec abi tantiaquid utsibobëd shubu abentsëquën tabadacimboecquid nuqui nendac. Adquid nuqui icmenuec nuqui icsaid bedshunash abided cuidadec Nuquin Papan Mado Esuquidistu unëspondash. Aid unësnëdaidënuquoio nuqui icsaidtedi paucbantequid nendac.

⁸Icsaisa nebi, quequi mua uadquin abipenquoio chuiquid nendac. ⁹Icsaobique. Ëbi pauc, Papa, quesheo tantiashun, Con mado unëso isun abi tantiaquid icsaid bëpiscudnu, quequin ambi chiacpadomboen niaquenquiocquin Nuquin Papan nuqui paucoaindac. Naden Nuquin Papan naindac: Matses icsaid ëmbi paucaid padpiden tantiamenu, quenquiocquin icsaisa nuqui icmendac. ¹⁰“Matses icsaisa nibëdquiec”, quequin Nuquin Papan dada uamiampid icnubi, Icsaisa nebi, quequin chiec, Muaquid Nuquin Papa nec, quiacimboec adquid

onquepec. Aden chuiquid Nuquin Papan pausuntemaid nendac. Adquid Esuquidistu tantiesa nec.

2¹Ma icsainquio icnu qeshun con nabo quequin adembi mimbi iste dada uaimbique. Isec onqueta. Icsaobi, quiash cuenenda. Abi tantiaquid icsasho isun Esuquidistun Nuquin Papa chiendac. Ëbi tantiaquid paucoata, quequin Nuquin Papan chiaid niaquesa icquin aton Madonquio Esuquidistun nuqui icsasho aden chiendac. ²Aidi matsestedi icsaid bedshunash abided cuidadec unëspondash.

³Ambi chiacpadomboen nabanquin Esuquidistu tantiaquid nebi, qeshun nuqui tantiendac. ⁴Esuquidistu tantiaquid nebi, qeshun Icbon chiacpadomboen nainquiocquin abipenquio chiendac adquidën. ⁵Ambi chiacpadomboen nabansho isun abi tantiamiantequid Nuquin Papan nua pausunendac. Aden pausunaidën, Aidbëd icquid nebi, quequin nuqui tantiendac. ⁶Aden pausunac Nuquin Papan Madonquio bëdamboec tabadquin nabanacpadomboen naimbi, quec nidaidën bëdamboec tabad.

⁷Naden nata, quequin chiaid chuca chienquiocquin mimbi tauamboen tantiondaid mibi chuiquin dada uaimbi.

⁸Mimbi tauamboen tantiondaid Esuquidistun, Naden nata, quequin chiaid chuca nendac. Nidaidën capuquin utsi tantiaquin nabanquin Esuquidistun ismiondashi. Adembidi Esuquidistupadquiocquin utsin ismiac mibi Esuquidistu tantiesa icboedi nëbi abipadquiocquin utsi tantiaquin nabante mimbitsen ismiac Esuquidistu tantiaquid utsi dadpen yanendac. Aidobidi aidën pausunac tantiananec tabadquin nabanec nec. Chieshëmënnquid icboedi aidën pausunac tantianquidquio yanec.

⁹Esuquidistu tantiaquid nebi, qeshun abi tantiaquid utsi chieshënec Nuquin Papan tantiacpadomboen pausunacmaid adquid nec. ¹⁰Esuquidistu tantiaquid utsi con utsibo nec, quequin tantianquidien Icbon pausunaid nendac. Adquid icsate bunenquio yec bëdamboec tabadquin ismequid nendac. ¹¹Esuquidistu tantiaquid utsi chieshënquid Nuquin Icbon pausunacmaid nec. Inchëshquio icnuc capuacbimboecquid adquid nec. Mayan icsan yua icquin ambi natiadquio yaid tantiesa nec.

¹²⁻¹⁴Esuquidistu tantiaquid icsho Nuquin Papan cuidenquiocquin mibi icsaid paucac. Nuquin Papa Abia Yampidquio tantiaquidquio mibi nec. Ambi paucaid tsyuecquid utsi-utsiec icsho ëmbi con nabo caidtedi chuiquin dada uaid nëid nec. Abia Yampidënquio Esuquidistun chiac abi tantiaquido utsi-utsiec dadpen yanondash. Adquido chuiquin tsusiobo quequin ëmbi dada uaid nëid nec. Ëmbi tsusiobo caid ambia tantiaquidën ismiac caniabobimboecquin comapenen tantiaquin tantesa uainquiocquido utsi-utsiec iquec. Aden comapenen tantiec mayan icsan yua icboedi nëbi Nuquin Papan chiaid tantiabentsëcquido yanash nëbi Nuquin Papan chiacpadomboen nate bunquido mibi nendac. Adec bunquido mayan icsan yua ictiapimbo icquido mibi nendac. Adquid ëmbi caniabo caidtedi ëmbi chuiquin dada uaid nëid nec. Ëmbi dada uaid mibitedishun tantiatequidquio neque. Isec onqueta.

Icsate bunesa icta, quequin chiaid

¹⁵Mayan icsan yuadenda. Icsate bunesa icta. Mayan icsa bunquid Nuquin Papapadquiocte bunesa nec.

¹⁶Abia Yampidquio Nuquin Papa nec.

Adquidpenquio mayan icsa nec. Aid Nuquin Papa chieshënquid nec. Adquid icquin Nuquin Papan chiaid mua uaquin chuiquin chuca uaic naden: Icsamane quenquiocquin icsaquin nanu quequin adota. Adecbidi icsamane quenquiocquin utsi icsasho isun ëmbitsen nanu quequin adoata. Dadpen bednu quequin utsi dëniacnueshun adota. Adec icsamane quenquiocnoc mayan icsan Nuquin Papan chiaid matses chieshëmec. ¹⁷Mayan icsan tantiaid ënëdendac. Aidën tantiacpadomboen tantiaquid icbobëd Nuquin Papa yacno tabadtiapimbo iquec. Nuquin Papan chiacpadomboen naquidien ënëdenquio yec Icbobëd tabadendac.

Esuquidistu chieshënquid dadpen choendac, quequin chiaid

¹⁸Adembi chiembique. Ëmbi con nabo caidon tantiata. Nëbi nëid nidaid naimbudec. Adecbidi Esuquidistu chieshënquid dadpen choendac, quequin chiondacadquieac ënden cho-choac. Dadpen cho-choacsho isun, Nëbi nëid nidaid naimbudendac, quequin nuqui tantiendac. ¹⁹Esuquidistu chieshënquid nuquibëd iccuededboedi ënden nidanepac. Nuquin Papan shubu abentsëquën tabadacpadpenquiocquid Esuquidistu chieshënquid iquec nidaniac. Nidaniacsho isun, Esuquidistu tantiesa iquec nuquibëd shubu abentsëquën tabadacpadpenquio icquido niosh, quequin nuqui tantiendac.

²⁰Esuquidistu chieshënësa mibi nendac. Nuquin Papan aton Mayan meniac abimbo chiaid tantiaquid mibi nendac. ²¹Nuquin Papan chiaid abimbo iquec quequin tantiaquid icsho mibi chuiquin dada uaic nebi. Nuquin Papan chiaid tantiesa mibi

icsho chuiquin dada uainquio ictsiambi. Abimbo chuiquid muatiapimbocquid nec, quequin mimbi tantiendac. ²²¿Tsutsi muaquid nepec? ¿quepecta mibi ique? Nuquin Papan Madombo nidaidënsun chidon tishac matsesash aton Papan chuimaidquio nec, quesa muaquid nendac. Adquid Esuquidistu chieshënquid nendac. Abentsëquidquobi Nuquin Papa nec, quesabidi adquid neoaic. Esuquidistu Nuquin Papan Madombo nec, quesabidi adquid neoaic. ²³Nuquin Papan Madombo Esuquidistu nec, quesa Nuquin Papa tantiesabidi nec. Nuquin Papan Madombo Esuquidistu nec, quequin chiec Nuquin Papan tantiaid papuduedaid Nuquin Papa tantiaquid nendac.

²⁴Tauamboen chiampid tantiadonec tantesa uainquiocquid yanta. Mimbi tauaquin tantiadoniaid tantesa uainquio yec Nuquin Papan Mado Esuquidistubëd shubu abentsëquën tabadac bimboecquido mibi iquendac. ²⁵Ëbëd shubu abentsëquën nidaidën tabadac bimboecquido ëbëd abuc ënëdenquio yec tabadte iquendac, quequin Esuquidistun chiaid nendac.

²⁶Esuquidistu tantiaquid mibi icsho Nuquin Papan chiaid niacmenuequid iquec, quequin chuioaimbique. Tantiata. ²⁷Nuquin Icho Esuquidistun tantiamiaid icquin utsi uain chuisho tantiesa icta. Esuquidistun ambi tantiaid pausunac ambi chiaid tantiaquidquio mibi nendac. Ambi pausunaid iquec, Mibi utsi tantiamenu, cac, Padi. Esuquidistun chiaid tantiaquidquio nebi. Esuquidistun abimbo chiaid tantiash bëdambo iquebi, mibi quendac. Aden Esuquidistun tantiamiaidquio yec abëd cuëshëdesa icnuec adequi tabadta.

**Nuquin Papan chiaid tantiaquid ambi
bacuë icmiaid**

²⁸Adembidi con nabo quequin mibi chuioaimbique. Adembi tantia. Esuquidistun chiaid tantiadonequieic tabadteneta. Adec tabadquin Esuquidistu choasho isash cuenenquio yec, Èbi, ambi paucaid, bednuec choec, quependac mibi. Abëdi nidebi, quequin caindonec tabadta. ²⁹Nuquin Papa bëdamboquid nec, quequin tantiaquin nuqui Nuquin Papan chiacpadomboen naquin, Ambi con bacuë caidquio nebi, quequin nuqui tantiendac.

3 ¹Matses tantiaquin naquidquio Nuquin Papa nec. Ma ëmbi unësquiocquin comapenen tantiaido ëbëdi tabadpanueshun con bacuëbo caimbi, quequin Nuquin Papan icsaisanquio tantiapampic. Aden chiampid abimbo iquec. Ambi con bacuë caido nuqui nec. Ambi con bacuë caidpenquio Nuquin Papa tantiesa yec aton Mado Esuquidistu tantiesabidi nec. Adecbidi Esuquidistu tantiaquid tantiesabidi nendac adquido. ²Nuquin Papan comapenen tantiaido mibi nec. Adquid icsho adembi mibi chuinu. Tantiata. Nëbi Nuquin Papan con bacuë caido nuqui nec. Aden ambi con bacuë caid icsho, Nadquidquio mibi icmendambi, ¿ada Nuquin Papa capec? Padenquio. Esuquidistupadquiocquin nabanquid Nuquin Papan nuqui icmec, quequin nuqui tantiadonetequidquio nendac. Esuquidistu nuqui bedec chosho isash, Nëbi aidpadquidquio Nuquin Papan nuqui icmendac, quequin tantiembi, nuqui quendac. ³Aid choabicnuc, Abipadquid iquendabi, quequin caindonequido nëbi Esuquidistu icsainquio yec tabadacpadquieic tabadte bunquid nuqui nendac.

⁴Nuquin Papan nadec bëdamboec tabadta, quequin chiaid niacquid abibi icsaquid nendac. ⁵Adnubien, Esuquidistu abuc tabadboedi nidaidënsun chidon tishac matsesun nuqui icsaid bedshunash abided cuidadec unëspanëdash, quequin nuqui tantiendac. Icsapenquiocquid Esuquidistu nec. ⁶Icbopadquidquio icnu quiaish Esuquidistubëd tabadacbimboecquid icsadenesa nec. Icsadenequid, Nuquin Papan Esuquidistu tantiamioshi, quetiapimbo iquec. Esuquidistu tantiesa adquio iquec.

⁷Con nabo, tantesa uamane qeshun muaquin chuibanaid tantiesa icta. Esuquidistu bëdamboec tabadacpadquieic tabadquid icsaisa nec.

⁸Abia icsadenequid mayan icsa nec. Aidën yua adquiecbidi icsadenendac. Mayan icsan yua matses icsho isash Nuquin Papan chiaid tantiaquidquio iquec Esuquidistu nidaidën choash matses icsaid bedshunash abided cuidadec unëspanëdash ma abi tantiaquid yec mayan icsan yua icboedi aidën yuadtiapimbo yampanuna.

⁹Nuquin Papan con bacuë caido icsadenesa nec. Ambi con bacuë caido Nuquin Papapadquidquio yec icsadenetiapimbocquid nendac.

¹⁰Mayan icsan yua Nuquin Papan chiacpadomboen naisa nec. Utsi tantiesa adquid nec. Nuquin Papan chiacpadomboen naquid Icbon bacuë nec. Icbon bacuë yec utsi tantiaquidquio nendac.

Esuquidistu tantiaquido tantiananaid

¹¹Esuquidistu tantiaquid utsibo tantiaquiota, quequin chiaid nuqui abia tantiondaid nendac. ¹²Aton utsimbo chieshënuquid Cain icpampidpadquid iquenda. Mayan icsan yua icquin aton

utsi cuesunepampic. Aden cuesuniaidën aton utsi Abedën abi tantiaquin nadenesho Nuquin Papan aid bédamboen isnubi Cainën ambibi tantiacpaden nadenesho Nuquin Papan bédamboen istiapimbo icpampic. Aden isac Cainën aton utsimbo Abed chieshëquin cuesunepampic. ¹³Cainën aton utsimbo chieshënacpadomboen Nuquin Papa tantiesan Nuquin Papan con bacuë caidtedi chieshënoaic. Nuquin Papa tantiesan mibi chieshënsho isash, ¿Adquidshenda mibi nepec? quenda. Nuquin Papan chiaid tantiesabimboec adenda. ¹⁴Esuquidistu tantiaquid tantienquiocboedi Esuquidistu tantiaquid yanash abi tantiaquid utsibo tantiaquidquio nuqui nendac. Aden abi tantiaquid utsibo tantiaquid icquin, Nuquin Papabéd tabadquidbimboecquid nebi, quequin nuqui tantiendac. Aton utsibo tantiesa cuëshédacbimboecquid nec. ¹⁵Aton utsi chieshënnquid, Con utsi cuesunenu, quiacbimboecquid nec. Adquid Nuquin Papabéd tabadtemaid nendac, quequin nuqui tantiendac.

¹⁶Matses tantiaquin nashunquidquio Esuquidistu icpondash. Nuqui tantiec, ma ëbéd ënëdenquio yec tabadpanu quiash unësmene, quenquio yec nuqui icsaquido icsho cuidnushe quiash abided cuidadec unëspondash. Abi tantiaquid icquin abi tantiaquid utsibo tantiaquin nashunec unësmene quenquio yec nuqui tabadendac.

¹⁷¿Aton nachoquid icnuc Esuquidistu tantiaquid utsin na nibëdquiocsho isec, Con utsi menenquio iquembi, quequid Nuquin Papapadquiocquin tantiaquidta nepec? Adquid Nuquin Papan chiaid pausunacmaid nec. Nuquin Papapadquiocquin nashunu quesa adquid nec. ¹⁸Ëmbi con nabo caid, Utsi tantiec bédamboec tabadquidquio nebi,

quec onquequinuidi tantiec tabadenda. Utsi tantiembi, quequin mimbi chiacpadomboen nabanquin ismeta.

¹⁹Aden mimbi chiacpadomboen nabansho isun Nuquin Papan tantiamiac dacuëdenquio yec Nuquin Papa chuinu quiash abi yacno puduedquidbimboecquin nuqui chuided-chuidedec. ²⁰Utsien Nuquin Papan chiacpadomboen abentse-abentsen naquid, Nuquin Papa dacuëdampambo iquec. ¿Abi chuisho adabi tantipatsiash? quequin tantiec tsadendac adquid. Adec tsadsho isun Nuquin Papan nadopec: Con Mado tantiaquid ëmbi paucaid, ëmbi con bacuë caid mibi nec. Mimbi chuisho tantianuna. Muesa nebique. Dacuëdenquiocquin ëbi chuita, quependac Nuquin Papa adquid caic.

²¹Nuquin Papa tantiaquido, adembi mibi chiembique. Tantiata. Nuquin Papan chiacpadomboen naquidënnquio Nuquin Papa bëisquidëmbimboen, Èbi menepec, quequin dacuëdenquiocquin chianendac. ²²Nuquin Papan ambi chiacpadomboen nabansho isun ambi tantiacpadomboen tantiamendac. Aden tantiamiac ambi tantiacpadomboen abi chuisho Nuquin Papan nuqui bédamboen isquin menendac. ²³Naden tantiata, quequin Nuquin Papan chiaid nad iquec: Abéd Abia Yampidquio, Esuquidistu, nidaidënnshun chidon tishac matsesaid Nuquin Papan chomiaid aton Madombo nec quequin nuqui tantiaidquio nendac. Adembi Esuquidistun chiacpadec abi tantiaquid utsibobéd tantiananendac. ²⁴Aden ambi chiacpadomboen naquidbéd Nuquin Papa iquec. Adquidquidquio Nuquin Papabéd ictequid nec. Abibimboecquid Nuquin Papan aton Mayan meniac ëbéd tabadquin tantiamiac, Nuquin Papabéd icquid nebi, quequin nuqui tantiendac.

**¿Nuquin Papan chiaidquiobida
chuiбанoshe? Isnu, qeshun Nuquin
Papan chiaidquio isteneta quiaid**

4 ¹Utsibo, Nuquin Papa chieshëñquidën chuimiaido dadpen iqueque. Aidën chuimiaidën chuisho tantiashun, ¿Nuquin Papan chiaidquiobida chuiбанoshe? Isnu qeshun Nuquin Papan chuiquin dada uamiaidquio isteneta. ¿Adquiobida iqueque? Isnu, qeshun isteneta.

²Nuquin Papan pausunaidën naden chiendac: Nidaidënshun chidon tishac matesaid Nuquin Papan chomiaid aton Madombo nec, quequin chuiбанendac.

³Nuquin Papa chieshëñquidën chuimiaidën naden chiendac: Nuquin Papan chomiacmaid Esus niondash. Aid aton madopenquio nec, quequin chiendac. Aden chuiquid Esuquidistu chieshëñquid nec. “Èmbi chomiaid chieshëñquid choec,” quequin Nuquin Papan chiampid mimbi tantiec. Aden chuiquid ënden dadpen cho-choac.

⁴Con nabo quequin Nuquin Papan aton Mayan meniac aidënquio tantiamiac Esuquidistu chieshëñquidon chuisho, Tantanu, quesа mibi nendac. Nuquin Papan meniaidën tantiamiac Nuquin Papan chiaid chiac dëniacacpadquiec mibi chieshëñquid cuenendac. ⁵Esuquidistu chieshëñquido Nuquin Papan chiacpadomboen naisа nec. Ambi tantiacpadenuidi chuiбанec. Aden chuisho tantiesа Esuquidistu tantiaquid nec. ⁶Aidën chuisho tantiesа nuqui nec. Nuquin Papan con bacuë caid nuqui nec. Adoac ambi tantiamiacpaden nuqui chuiбанsho Nuquin Papa tantiabenquid utsibon tantiendac. Adsho isun Nuquin Papan tantiamiaid aido nec, quequin nuqui tantiendac. Nuquin Papa tantiesain Esuquidistu chuiбанsho, Tantanu,

quesа iquendac. Adsho isun, Abipenquio chuiquidën yua nec, quequin nuqui tantiendac.

**Nuquin Papan ismiac adecbidi
tantiananquidquio ma nuquitedi
icoapanuna quiaid**

⁷Utsibo, Nuquin Papa tantiaquido adembi mibi chiembique. Adembi tantiata. Nuquin Papan ambia utsi tantiaquin nabanquin ismiac adecbidi nuqui abi tantiaquidobëd tantiananquin ma nabanoapanuna. Utsi tantiaquidquio Nuquin Papan bacuë nendac. Adquid Nuquin Papa tantiaquidquio nec. ⁸Utsi tantiaquidquio Nuquin Papa nec. Adquid icnuc utsi tantiesа yec, Nuquin Papa tantiembi, quetiapimbo iquec.

⁹Mates tantiaquin Nuquin Papan aton Mado Abentsëcquiobi Esuquidistu matesmiac mates icsaid bedshunash abided cuidadec unëspondash. Adoac abi tantiaquido abëdi ënëdenquio yec tabadendac. ¹⁰Aden Nuquin Papan mates tantiaquin naid dëniactiapimbo nuqui iquendac. Aidëmbien nuqui tantiabudquin aton Mado Abentsëcquiobi nidaidën chomiac nuqui icsaquido icsho cuidmenquiocnoec abided cuidadec unëspondash. ¹¹Nuquin Papa comapenen tantiaquidquio icquin Nuquin Icbopadquiocquin Esuquidistu tantiaquid utsi tantiaquiotiad. ¹²Nuquin Papa matesën istiapimbocquid iquec. Abi tantiaquid utsi tantiaquiocsho isash Nuquin Papa nuquibëd tabadec. Aden aton Mayan meniac aidën tantiamiac Nuquin Papapadquiocquin nuqui tantiaquiendac.

¹³Aton Mayan meniac ambi tantiamiaidquio yec Nuquin Papa ëbëd iquec, nuqui quendac. ¹⁴Nuquin Papan Madomboen nuqui isaidquio icpadenec. Aden isboshon uquë nësiatiadquido nuqui icsho mëñchicquid Nuquin Papan

chomiaid chosh, quequin nuqui chian-chianec.

¹⁵Esuquidistu Nuquin Papan Madombo nec, quequin tantiaquidquo Nuquin Papan pausunquin aton Mayan meniaid nec. ¹⁶Aden aid meniaid icquin, Ambi tantiaid nebi, quequin nuqui chuidonec.

Nuquin Papan matses tantiacpadomboen utsi tantiaquid Icbobëd icquidquo nendac. Adecbidi Icho abëd icquidquo nendac. ¹⁷Nëid uquë nësecatequid nec; nëid ëbëd icquid nec, quequin Nuquin Papan chuibante ushë chonoc, Abëd icquid nebi, quec dacuëdenquo yec Nuquin Papa tantiaquid aton Madopadquiocquid Nuquin Papa yacno puduedendac. ¹⁸Nuquin Papan tantiaid dacuëdenquo iquendac. Ambi tantiamiaid dacuëdesa nec. Abi tantiesa, Ëbi icsaquid icsho cuidtsiash, quec dacuëdenac. Aidi utsi tantiesa yec dacuëdec.

¹⁹Nuquin Papa Ambia Tantiaquid icquin ismiac tantiananquidombo nuqui nendac. ²⁰Ëmbi isacmaidquo Nuquin Papa icsho, Aid tantiaquid nebi, quequin Esuquidistu tantiaquid utsi ambi isteniaid chieshënquid iquec muaquid nendac. Ambi isteniaid chieshënquid iquec ambi isacmaidquo Nuquin Papa chieshënquid nendac. ²¹Nuquin Papan chiaid nad iqueque. Tantiata. Nuquin Papa tantiaquid nebi, quequin Nuquin Papa tantiaquid utsibo tantiatiad.

Nuquin Papan Madombo abimbo tantiaquid

5 ¹Nuquin Papan Madombo aton Papabëd abuc icboedi nidaidën chomiac matsesaid Esuquidistu nec, quequin tantiaquid Nuquin Papan con bacuë caid nendac. Ambi con bacuë caidënquo Nuquin Papa tantiendac.

Adembidi Nuquin Papan con bacuë caid utsibo nuqui tantiendac. ²Ambi con bacuë caidën Nuquin Papa tantiaquin ambi chiapadomboen naquidquo icquin ambi con bacuë caido nuqui tantiendac. ³Aden tantiaquin Nuquin Papan, Naden nata, cac nabanendac. Ambi, Naden nata, quequin chiaid natiamiantemaid nec. ⁴Aden Nuquin Papan con bacuë caid icquin ambi chiapadomboen nabanec tabadquin dëniacacimboen icsamenuequid nuqui cuemendac. Adembidi Abia Yampid nidaidënsun chidon tishac matsesash tabadec aton Papabëd cuëshëdesa Esuquidistu nec, quequin tantiaquid nuqui icnuc icsamenuequid cuenendac. ⁵Esuquidistu Nuquin Papan Madombo Yampid nec, quequin tantiaquidënquo ismiac icsamenuequid cuenendac. Ai, icsamenuequidën yuadesa Esuquidistu tantiaquidquo nendac.

⁶Esuquidistu Nuquin Papan Madombo nec, quequin abimbo chiaid iqueque. Tantiata. Chuinu. Nuquin Papan chomiaid nidaidënsun chidon tishac matsesash capusho acten mentoacsho: “Ëmbi bëdamboen tantiaidquo mibi nec. Mibi isash bëdambo iquebi, Mado,” quequin Esuquidistu chuipondash Nuquin Papan. Adashic, yuec-yuecpambo yacsho cuesten dectanac diadec unësec aton Papa chiec: “Ëbi yuedta, Papa,” quiash Esuquidistu unësacsho naciash aton intac chididiquepondash. Adashic, Nuquin Papa abimbo chuiquidpadquidquo icquin aton Mayanën tantiamiac, Esuquidistu Nuquin Papan Madombo nec, quequin tantiaquin chiendac nuqui. ⁷Nuquin Papa yec aton Mado yec aton Mayan yec quequin abucshun aidtedishun abentsëc yacimboecquin Esuquidistu Nuquin Papan nidmiac chosho nidaidënsun tishac matsesaid

nec, quequin chuided-chuidedec.
⁸Adecbidi nidaidënuësh Esuquidistu matsesacsho isun, Nuquin Papan Madombo nec, quequin ismenuec aton Mayan abucüesh budash aidbëd icpondash. Adembidi yuecshun ambi chiacpadomboen acten mentomiacsho, Con madombo nec, quequin chuiopondash. Adembidi yuecshun ambi chiacpadec unëso isun, Con madombo nec, quequin inchëshacimboecnuc icmequin Nuquin Papan nadatiambocquin ismebampondash. ⁹Aden ismiac isondaidën naden chiec. Aton Mayan budsho isombi. Adembidi Esuquidistu acten mentosho isombi. Adembidi, Unëso isombi, quequin isondaidën chiec. Aden chuinubi Nuquin Papanquo, Con madombo nec, quequin ambia Esuquidistu chuiquidquo icsho tantiadonetequidquo nuqui nendac. ¹⁰Adembidi Nuquin Papan Mayanën tantiamiac, Esuquidistu Nuquin Papan Madombo nec, quequin tantiaquin adomboembidi chuiopapec nuqui. Esuquidistu Nuquin Papan madopenquo nec, quequid, Nuquin Papa muaquid nec, quiacbimboen chuiquid nendac. ¹¹Con Madombo, Esuquidistu nec, quequin Nuquin Papan chiaid tantiaquidquo abi yacno nidash abëdi ënëdenquo yec tabadendac. Matses icsaid bedshunash abided cuidadec aton Mado unëshpanëdash, quequin tantiaquid Nuquin Papa yacno tabadtequid nuqui nendac. ¹²Esuquidistu tantiaquid ënëdenquo yec Nuquin Papa yacno tabadendac. Aid tantiesa aidbëd tabadiapimbo iquendac.

**Ma tantiaquidquo mibi
icpanuequin chiaid**

¹³Nuquin Papan Madombo Esuquidistu nec, quequin tantiaquid,

Icbobëd ënëdenquo yec tabadtequid nendac, quequin ma tantiaquidquo mibi icpanuequin mibi chuiquin dada uaimbi. ¹⁴Adec abëd ictequid icquin ambi tantiamiacpaden chuisho, Nuquin Papan tantiec, quequin nuqui tantiendac. ¹⁵Abitedi tantiaquidquo icquin ambi tantiacpadomboen tantiamiac nuqui chuisho Nuquin Papan menendac.

¹⁶Esuquidistu tantiaquid nebi, queboedi icsasho isun, Cuëshëdnushe qeshun aid bëdamboen tabadme, Papa, quequin chiacpaden Nuquin Papan naindac. Utsien, Esuquidistu tantiaquid nebi, queboedi, Icsaquionona, quiacpadec tabadsho isun, Cuëshëdnushe qeshun aid bëdamboen tabadme, Papa, cainda. Nuquin Papan chiaid tantiate bunesa aid nec. ¹⁷Nuquin Papan chiaid niaquec icsaic. Padnuen, Nuquin Papan bacuë nebi, queboedi icsash, Icsaquid nebi. Padpidec icsatiapimbo iquebi, quequin chuisho tantiashun Nuquin Papan padpiden paucoaindac. Aid cuëshëdenquo yec Nuquin Papabëd tabadendac.

¹⁸Nuquin Papan con bacuë caid iquec icsadenesa nec, quequin nuqui tantiendac. Nuquin Papan chiaid niacmane quiaish icsate bunesa nebi, quiacpaden nanuesho tantiamequin pausunendac. Adoac Nuquin Papa chieshënnquidën adquido yuadiapimbo iquendac. ¹⁹Esuquidistu tantiec Nuquin Papan con bacuë caid nebi, quequin nuqui tantiec. Adesa Nuquin Papa chieshënnquidën yua nec, quequin nuqui tantiec. ²⁰Nuquin Papan Madombo abuc abëd icboedëmbi nidaidënsnun Nuquin Papa chuibanquin tantiamiac. Aidën aton Mayan abi tantiaquid meniac, Nuquin Papa Abentsëcquiobi iquec, quequin nuqui tantiendac. Aidbëdquicquid nuqui nendac. Aton

Madombo aton Papabimboecquid nec.
 Aid tantiec aidbëd ënëdenquo yec
 nuqui tabadendac, quequin nuqui
 tantiendac.

²¹Con nabo, Nuquin
 Papabëdtactsëqui aton Madombo

Esuquidistu tantiaquid icta. Utsin
 nacnenaaid ismequin, Nuquin Papa
 neque. Nëid tantiaquiota, cac
 tantienda. Esuquidistu nebi, qesho
 adembidi tantienda.

Nëbi padi. Aided chiombi.